

तुबारि संपादकीय
टीम

- ◆ अस इ उम्मिद करं लगे से कि एण बाड़े दिन अन्तर सुआ मेहणु इस कम अन्तर सहयोग कते।
- ◆ इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगि घाटि अन्तर पढ़ू जे इ पत्रिका शुरू कियो सि।
- ◆ तुबारि एक अवाणिज्यिक पत्रिका भो।
- ◆ तुबारि पत्रिका कोइ मेहणु, जनजाति, त संस्कृति गल्लि कहेण जे नेई छपाण लगे। अगर कोइ ई सोचता बि त अस जिम्मेवार नेई।
- ◆ छपाणे पेहले सोभ आर्टिकल दुई टाई पांगेई मेहणु हरालो असे। इ त खुलि बोक असि कि पेहिल बार पांगवाडि लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।
- ◆ आर्टिकलस ना मिलए, या घाटि मेहणु के मदद ना मिलए त तुबारि पत्रिका कदि बि बंद भुई सकति।
- ◆ कोइ चिज छपां सि या नेई छपां जे तुबारि संपादकीय टीम पुरा अधिकार असा।
- ◆ अस सोभि पांगि मेहणु जे हात जोड कई निवेदन कते कि, तुस बि कोइ अछा आर्टिकल, पुराणि या नौइ कथा, कहावत, कविता, त नौवे धीत (पांगवाडी अन्तर) लिख कइ छपां जे हेंचदे दिए।
- ◆ अस किलाड केन्द्रीय पुस्तकालय, त बजार राखे ठेके भैड हरिरामे दुकान अन्तर तुबारि ड्रॉप बॉक्स पुठ बि अपुं सझाव ओर आर्टिकलस रखुं जे सुविधा कियो असि।

तुबारि संपादकीय टीम

- ☎ 9418431531
- ☎ 9418429574
- ☎ 9418329200
- ☎ 9418411199
- ☎ 9418411599

सही चुनावे सही नतीजे

चुनाव करं हैं रोजे कम भो। अलग-अलग मेहणु फैसले नेण जे अलग-अलग तरीके लान्ते। एक जलहेणु कथा पढ़े। एक जलहेणु, ग्रां-ग्रां घेई कई समान बेचतीथ। से जिखेई बि ग्रां-ग्रां घेन्तिथ। जेठि बि तेस दुबथि मेतिथ त से एक लठि टान्तिथ तेस खड़िया फटान्तिथ ताऊं से लठि जेस कना झड़ी तेस कना जे घेन्तिथ। एक रोज से लठि घेड़ी-घेड़ी खड़िया फटां लगोथी। एक मेहणु तेस केआं पुछु कि से कि करं लगोसी? तुस जाणते न तेसे जबाव कि थिआ? बोति इ लठि घेड़ी-घेड़ी उमल कना जे झड़ण लगोसी जदकि माऊं सुमल कना घेण असु। एस कहानी केआं पता लगता कि असि त सोबि मेहणु फैसला नेण जे समझदारी त कारणे जरूरत पड़ती। ध्यान रखं एन्ता।

जिखेई बि असि कोई फैसला नेण भुन्ता त अगर तेस टेम अस अपु अन्तरात्माई शुणेल त फैसला नेण आसान भुई घेन्ता। कि, कऊं विकल्प चुणु असा। अगर तूं मन अन्तर गलत करणे इच्छा अइएल बि, तिखेई तुस अपु जिन्दगी मूल सिध्दांत, ईमानदारी, अहिंसा, मोटी के बोक मनी त तन्के इज्जत करीं, लेहरीं नाउ, झूठ ना बोलुं, चोरुं जांरुं नाउ, कुई धुई ना छेड़ीं, ब्याह केआं पेहले परहेज ना रखुं, आदि याद करे, कि हैं जिन्दगी कोई न कोई मकसद असा। त अस अपेपु समझी घेन्ते कि ए असि हैं बथ केआं भुलाणे एक छलावा

भो, जे असि नजर अन्दाज करुं असु। सही चुनाव करणे बोलि सही नतीजे भुन्ते। अगर अस कुछ बि फैसले नेण केआं पेहले तेसे नतीजे बारे सोचते त मठे-मठे अस सही फैसले नेण लागि घेन्ते। चुनाव करं केआं पेहले तेन्के नतीजे बारे सोचे। मठिणयार अन्तर अस जेबि फैसले नेन्ते हैं भविष्य पुठ तेसे गहरा प्रभाव पड़ता। केतने फेरि अस इ बिसरी घेन्ते कि हैं फैसले बोलि हैं भेड़बाइ बि बड़आ फरक पड़ता। हैं बोलि एक गलत फैसला भोएल त पुरे गिहे शान्ति भंग भोइ घेन्ति। असि हेरु कि कुछ फैसली के नतीजे खोटे भुई सकते, जेस पुठ असि पता पछताण एन्तु। तऊं त असि खरे चुनाव करणे फैसला नेण चाहिए। मठिणयार अन्तर बि हैं जिन्दगी होरि जे प्रेरणा भोई सकती।



जिखेई बि असि कोई फैसला नेण भुन्ता त अगर तेस टेम अस अपु अन्तरात्माई शुणेल त फैसला नेण आसान भुई घेन्तु।

बुद्धिमानी के बोक

यक नगर अन्तर एक राजा भुन्तथ। तेसे गभुर बान्दरि जुओई खेलतेथ त तेन्के धे सुआ खाणे चीज देन्तेथ। तेस राजे महल अन्तर मटुट राजकुमारि जे सुवारी करुं जे डेडुड बि थिए। तेन्हि डेडुड बिच एक डेंगु थिउ, जे रात दिन आटि अन्तर घेई कई रोटी खई छान्तुथ, से निडर भोई गो थिउ। रसोईया तेस, जे, मेऊ, तेनि बई मडतथ। डेडुडु त रसोईये मडीन्ते बान्दरि के सरदारो काई छडे। बान्दरि के सरदारो सोचु कि एन्के

झगड़आ असि जे बुरा भोई सकता। तेनि सोब बान्दर यक जगई भिऐ त बोलु कि रसोईये त डेडुड झगड़आ पक्का, हैं विनाशे कारण बणता। केनि बोलो बि असु कि “जेस गी अन्तर यहाणि झगड़आ भून्ता तेठि जे जीं चाहता से तेठिया दूर घेई घेन्ता”। त चले अस सोब बि इस महल छड दी कई जंगल अन्तर घेई घेन्ते। ताऊं सोब बान्दर बोते अस महले सुख छड दी कई कुहें न घेन्ते। एस शुणि कई बान्दरि के सरदारे टीरि अन्तर पोणि एई गोऊ। तऊं से अकेला जंगल जे घेई गा। तेस केआं पता दोके रोज से डेंगु फिर आटि अन्तर गरु त रसोइये तेस पुठ जाओ कठोडे बई दिति। तऊं तेसे ऊनि जुओई आग लग गई। डेंगु तऊं घोडि के गुआडि घेई गरु त आग हुशाण जे लोटिं दे लगु। तिखेईये तेथ घास अन्तर आग लगी गई ताऊं केतने घोडे फुकी कई मरी गे त केतने घायल भुई गे। राजा बोता मे अतो घोडे मरि गे। त जे घायल थिए तेन्हि जे राजे वेद भिया। वेद बोता कि घोड़ी के जकम मुकाण जे बान्दरि के मन्झ लाण एन्ति। राजे आदेश दिता कि सोब बान्दरि मारि कई तेन्के मन्झ घोड़ी जुओई ले। बान्दर एस बोक शुणि कई बोते मरि गे अस त अब।


बोलो बि असु। जे मेहणु कल्याणकारी वचन छड दी कई, उमला कम कते। बुद्धि बाडा मेहणु तेन्हि जे दोस्ति के शकल अन्तर दुशमण बोते।
.....(अनुवादिक कहानी) शुभम।

कुछ खास खबर

- ◆ रोहतांग पास खुलि गो असु त मनाडि जे छोटी गाडि चलण लगो असि।
- ◆ गाहरी के ग्राई अन्तर मटर बिजाई कम शुरू भुई गो असु।
- ◆ बि.एस.एन.एल बाडि के मशीने खराप भूणे बोलि टाई हफते सिगनाल ना आ त हउ बि घट सिगनाले बोलि मेहणू परेशान असे।

दुसरी क्लासे गभुर केआं, मास्टर पुछता.....

By Shubham



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574

खाने दुवांइ नेणे वक्त एक्सपाईरि डेट हेरूं जरूरी असी।

ट्यारे पंगेई मेहणुओ, खाने दुवांइ नेणे वक्त अस यक चिज पुठ ध्यान रखुणे जरूरी असी। दवखाना या हस्ताड कैआं दुवांइ नेणे टेम, दुवांइ किखेइं बणोसे डेट, त दुवांइ किखेइं एक्सपाईरि भुणे डेट पुठ पक्का ध्यान रखे। (एक्सपाईरि भुणे डेट - दुवांइ काम करणे गुण खतम भुणे टेम) टिकि पत्ते पतुं, पिणे दुवांइ बोतुल पुठ, सुयि दुवाइ बोतुल पुठ बि ई सोब छपो भुन्तु। एक्सपाईरि दुवांइ खाणे बोली, बिमारी ठीक न भुन्ति, त होरा रियाकषन बि भोइ सकता। रियाकषने बोलि पुरा जिशम कशीण लगता, दिल घबराण, चक्कर एण बगैरा बगैरा नुकसान भुन्ति, त कदि-कदि मेहणु मर बि सकते। इस जुए, एक्सपाईरी डेट पुठ नजर रख कइ तस दुवांइ न खायेल, असी कोई नुकसान न भुन्ता। अगर हस्ताड अन्तर एक्सपाईरी दुवांइ देयाल, त डाक्टर साब जे बोलि कई होरे दुवांइ नेण।

